

## Tan̄taŋa tsghatá Iwa Pwal ŋa 1 La Tesalunik

<sup>1</sup> I'i Pwal ta vindaghunafta, kawadaga ŋni nda i Silas nda Timute, ŋa kaghuni Igliz, mnduha Lazglafta Da nda Mgham Yesu Kristi ma luwa Tesalunik. Ka vlaghunavla Lazglafta ta zdakatahudi, nda zdakwani.

### *Zlghay nda ŋudufa la Tesalunik*

<sup>2</sup> Ta gdagda ŋni ta rfa Lazglafta ta ghəŋa kaghuni demdem. Ta kulay ŋni ta kaghuni ma du'a ŋni. <sup>3</sup> Ta gdagda ŋni guli ta havakta ta kəma Lazglafta Da ŋni ta slna zlghay nda ŋudufa ghuni, nda yifatá slna ta magə kuni, kabga dvafta ya dvaf kuni nda dihata fatá ghəŋa ghuni ta Mgham Yesu Kristi. <sup>4</sup> Zwanama da, nda sna mu kazlay: Dvudva Lazglafta ta kaghuni ka zbaftá tsi ta kaghuni ŋa nzakway ka ŋani kə'a. <sup>5</sup> Ma mnaghunata ŋni ta Lfida Gwada ná, gwada nda wubisim kwenkwen yeya a mnaghuna ŋni wu, nda mbrakwa Sulkum nda ghuḅa guli mnaghunata ŋni. Nda sna aŋni kazlay: Vərda gwada tsa gwada ta gwadə ŋni ya kə'a. Nda sna kaghuni ka aŋni nzakwagaptá nzaku da kaghuni ŋa kata kaghuni. <sup>6</sup> Kaghuni, ksafksa kaghuni ta sada ŋni, nda ŋa Mgham Yesu. Dər má ta ghuya dan̄wa kuni katakata, tsu'aftsu'a kuni ta gwadani nda rfu ma mbrakwa Sulkum nda ghuḅa\*. <sup>7</sup> Mantsa ya marananta kuni ta nermata nzakwa ghuni ta mnduha Lazglafta

\* **1:6** Ngha ta Slna gwal ghunay 17:5-9.

ta hadika Mekaduniya nda ya ta hadika Akaya. <sup>8</sup> Əḡka'a ka kaghuni kəl ndəghatá mnduha ka snaḡtá gwada Mgham Yesu ma inda vli. Ta hadika Mekaduniya nda Akaya yeya a kuraghuta tsi wu, snanaghasna ta mnduha dər ndigandiga ká kuni zlgħaftá Lazglafta. Had gwada ḡa mnəgelta ḡni ḡa taḡ ta ghəḡa ghuni wa. <sup>9</sup> Nda wa taḡ ta rusa mnduha ḡa ḡni, ká kuni tsu'aftá aḡni ma lagha ḡni da kaghuni, nda ya ká kuni zlaḡtá skwa wuyay ka mbədavata tsələu ta kəma vərda Lazglafta ya ta vla hafu, <sup>10</sup> ḡa kzla zwaḡani Yesu, ta saha ta luwa. Tsa zwaḡani sli'aganap Lazglafta ma mtaku, ta klaptá amu ma guma Lazglafta ta sagha ya.

## 2

### *Slna Pwal ma luwa Tesalunik*

<sup>1</sup> Zwanama da, nda sna kaghuni kazlay: Nza a tsa lagha lagha ḡni da kaghuni ya ka bətbət wu kə'a. <sup>2</sup> Nda sna kaghuni guli ka ḡni ghuyə ta daḡwa ma luwa Filipiya, nda ya ká həḡ razaḡnata. Ama ka taftá ḡni ta us tiri nda mbrakwa Lazglafta ka mnaghunatá Lfida Gwada ta sagha da Lazglafta mataba ndəghata ghuya daḡwa. <sup>3</sup> Gwada ya mnə ḡni ná, had tsakalawi mida wu, had nənba kaghuni mida wu, had bara kaghuni mida guli wa. <sup>4</sup> Katək ná, manda va ya klaf Lazglafta ta aḡni kazlay: Nda ra kuni ka mna Lfida Gwada kə'a ka vlaḡnata ya, manda va tsaya ta mna aḡni. Mna a aḡni ḡa zdanaftá ḡuduf ta mnduha wu, ḡa zdanaftá ḡuduf ta Lazglafta ta mna aḡni. Nda sna tsatsi ta skwi ma ḡudufa mu. <sup>5</sup> Nda sna kaghuni kazlay: Ta walaḡ a aḡni ta hihijaḡtá hihijaḡu da mndu wu

kə'a. Had gwadaŋa hahata mndu gwadaŋni wa. Nda sna Lazglafta kazlay: Mantsa ya nzakwani kə'a. <sup>6</sup> Nəvanŋa a anŋi ta rfanŋaghata mnduha, dər kaghuni, dər sanlaha ma mnduha wa. <sup>7</sup> Dər má dza'a marayŋni ta glakwa nzakwaŋni ka ghunata mnda Kristi mndani ná, maranŋa a anŋi wa. Katək ná, le6tekw hanaganataŋni ta ghəŋaŋni manda ya ta nghə marakw\* ta zwanani ya. <sup>8</sup> Ma tsa fatá ghəŋaŋni ŋaghuni ya ná, mnaghunata Lfida Gwada ta sabi da Lazglafta kwenkwenŋyeya a mnaghunaŋni wa. Kumanŋkumaŋni ta vlaghunata nda hafaŋni tani, kabga lamla kuni da ŋudufaŋni kahwathwata. <sup>9</sup> Zwanama da, ta havakhava kuni ta datá vghaŋni ka maga slna da kaghuni. Si ta ksayŋni ta slna nda rvidik tani, nda fitik tani, kada kwalaŋni da ghuyanaptá danŋwa ta dər wati mataba ghuni, nda skwiŋa zayŋni ta mnəŋni ta Lfida Gwada ta sagha da Lazglaftaŋa ghuni.

<sup>10</sup> Nda sna kaghuni kazlay: Nda nza kaghuni ka masləmtsəkaŋni kə'a. Mantsa ya nzakwani da Lazglafta guli. Ka nərma mnduha nzataŋni da kaghuni, ka mnduha Lazglafta, ka gwal tdukwa nzakwaŋni, had sana skwiŋa tsanŋavata wa.

<sup>11</sup> Nda sna kaghuni guli kazlay: Manda nzatá nzakwa i da nda zwanani ya nzataŋni nda inda kaghuni, <sup>12</sup> ka vla hidaku nda mbrakuŋa ghuni. Vlaghunavlaŋni ta hidaku,ŋa nzay ghuni ta nzaku manda ya ta kumə Lazglafta ya ta hgaftá kaghuniŋa lama ghuni da ga Mghamani nda glakwani ya.

<sup>13</sup> Ta gdagdaŋni ta rfa Lazglafta guli, kabga

---

\* **2:7** Mamu dzəghu ma le6tekwaku: Nzanzaŋni le6tekw. Ka nzatá ŋni manda zwani kwitikw kwitikw, ka sanlaha ta mnay.

ma fitika mnaghunata ηni ta gwada Lazglafta ná, tsu'aftsu'a kuni, ka zlghafta manda va gwada gwadagap Lazglafta, manda ya gwadagap mnduha a wa. Manda va tsaya nzakwani kahwathwata, sagha da Lazglafta tsa gwada ya, ka ksə tsi ta slna ma kaghuni ta zlghafta ya. <sup>14</sup> Zwanama da, nuna kaghuni manda Igliza Lazglafta ta nzakway ma Yesu Kristi ta hadika Zudiya† ya. Ghuyə ghuya kaghuni ta danwa da gwal ta hadika ghuni, manda ya ghuyanap la Yahuda ta hahəη ya. <sup>15</sup> Tsa la Yahuda ya ta pslatá la anabi, ka dzatá həη ta Mgham Yesu, ka limistá həη ka giri‡ ηa mu guli. Zdəgana a tsa skwi ta magə həη ya ta Lazglafta wu, nda nza həη ka ghuma inda mnduha. <sup>16</sup> Ta kumay həη ta pyaftá aηni ta mna gwada Lazglafta ηa gwal kul nzakway ka la Yahuda, yaha həη da mbafta. Ndanana, hđanamhda həη ta dmakwa taη, ka kdavakta tsi nda basafta Lazglafta ta ηuduf ta ghəηa taη§.

<sup>17</sup> Aηni zwana ma, tahula dgata mu ta vgha labla fitik mida, kuma mu yeya kul guyafta. Nziya nza tsi ná, kawadaga mu ma ηuduf. Ta ksaηnaksa mamaya ghuni katakata. Ta kumay ηni ta ng-haghunaghata. <sup>18</sup> Mantsa ya ná, kumafkuma ηni ta vradaghata da kaghuni. Nda kda fitika i'i Pwal ka ghəηa da ta fatá fitikani, ama ka pyaftá halaway ta aηni. <sup>19</sup> Ta wa fatá ghəηa ηni, nda haratá ghəηa ηni, nda ghərba zewazewa glaku dza'a ηni mutsay

---

† **2:14** Ngha ta Slna gwal ghunay 17:5-6. ‡ **2:15** Ngha ta Slna gwal ghunay 9:23, 29, 13:45, 50, 14:2, 5, 19, 17:5, 13, 18:12. § **2:16** Ta ghəηa aya 15-16 ná, grawa gra nda Ruma 11, ma vla mnay Pwal ta gwada ta ghəηa kđanaktani kahwathwata ta mna gwada ta mbaku, ηa la Yahuda.

bađu fitik dza'a sagha Mgham Yesu Kristi ya katæk na? Ta kaghuni ya a katæk tsa wa? <sup>20</sup> Manda va tsaya nzakwani, kaghuni glakwa ηni, kaghuni haratá ghəŋa ηni.

### 3

<sup>1</sup> Sana skwi guli ná, ma trapta ηni ta kzlay, mal nzaghu mu hadna ma luwa Atina\*, ka ηni <sup>2</sup> ka ghunadapta da kaghuni ta Timute ta nzakway ka zwanama ηni, ta ksa slna Lazglafta ya guli. Kawadaga ηni nda tsi ta mna Lfida Gwada ta ghəŋa Yesu Kristi. Ghunadap ghuna ηni da kaghuni ηa sgaghunaghatá mbraku, ηa dihavata ghuni ma zlghay nda ηuđuf, <sup>3</sup> kada kwala ηuđufa dər wa da tđu ma na ghuya danwa ndanana, kabga nda sna kaghuni kazlay: Favamafa Lazglafta ta tsaya kə'a. <sup>4</sup> Ma fitika nzakwa ηni da kaghuni ná, ghadaghada ηni ta mnaghunata kazlay: Dza'a mamu ghuya danwa katakata kə'a. Tsaya tama ta slaku manda va ya snaŋ kuni. <sup>5</sup> Ma trapta da ta hbanatá ηuđufa da, kəl yu ka ghunadaptá Timute da kaghuni, ηa snaŋtá nzakwa zlghay nda ηuđufa ghuni. Ta zləŋay yu ta baraghata halaway ta kaghuni, da nzatá tsa slna maga ηni ya ka bətbət.

<sup>6</sup> Ndanana tama, sli'afslia Timute da kaghuni† ka vragaghuta da aŋni, ka rusanəftá tsi ta gwada ta zlghay nda ηuđufa ghuni, nda ya ká kuni ta đvutá mndu. Ka mnanəftá tsi guli ya ká kuni ta famtá aŋni ma du'a ghuni dardar, nda ya ka kuni ta kuma nghəglanťa aŋni, manda ya ta kumə aŋni ta nghanťa kaghuni ya guli. <sup>7</sup> Tsaya tama

\* **3:1** Ngha ta Slna gwal ghunay 17:15-16. † **3:6** Ngha ta Slna gwal ghunay 18:5.

zwanama, lbaɲnalba zlgħay nda ɲudufa ghuni ta ɲuduf, ma tsa ghuyata daɲwa ɲni basu ɲni ya. <sup>8</sup> Ndanana tama ná, ta hafu ɲni, kabga dihatá vgha ghuni ma ndi'atá vgha ghuni ta Mgham Yesu. <sup>9</sup> Ndaw dza'a rfa ɲni ta Lazglafta ɲni ta ghəɲa kaghuni ma na zdaɲnafta zdaɲnaf kuni ta ɲuduf ta kəmani na? <sup>10</sup> Nda rvidikani tani, nda fitikani tani ɲni ta ndi'ata ka maga du'a da tsi, ɲa vlaɲnatani ta tvi, ɲa lagha ɲni da nghaghunaghata, nda ya ɲa kdighunistá skwi ya ta pdaghuta ma zlgħay nda ɲudufa ghuni.

<sup>11</sup> Má ka bhadaɲnagħaɓha Lazglafta tsatsi ka ghəɲani ta nzakway ka Da mu, nda Mghama mu Yesu, da kaghuni. <sup>12</sup> Kaghuni ya guli, má ka sgaghunagħa sga Mgham Yesu ta tsa dvu mataba ghuni ya, nda ya ta magə kuni ɲa inda sanlaha ma mnduha ya guli, ka nzakwa tsi manda va ya ta dvu aɲni ta kaghuni ya. <sup>13</sup> Má ka sladanafs-lada Lazglafta ta ɲudufa ghuni ɲa nzakwa ghuni nda ghuɓa kul had gwada ta ghəɲa ghuni ta kəma Lazglafta Da mu, badu sagha dza'a sagha Mghama mu Yesu Kristi kawadaga nda inda duhwalhani ya.

## 4

### *Nzaku ta zdəganatá Lazglafta*

<sup>1</sup> Zwanama da, nu skwi ta pdaku ɲa mnay, ya nda ghada taghaghunafta ɲni ka kuni da magay ɲa zdəganatá Lazglafta. Ya manda va tsaya ta nzakwa kuni ta tsa nzaku na. Ta ndəba ghuna ndəba ɲni ta dzvu katakata, ta vlaghunavla ɲni ta hidaku manda va tsaya. Ma hga Mghama mu Yesu Kristi, ka kdanta kuni ta dza'a ta kəma ta kəma.

<sup>2</sup> Nda sna kuni ta nzaku ya taghaghunaf ηni nda ma mbrakwa Mghama mu Yesu. <sup>3</sup> Skwi ya kumə Lazglafta ná, nzata ghuni hezle' a ta kəmani kul had hliri. <sup>4</sup> Snaŋta dər wa ta nzaku nda markwa taŋ, ka vlanťa glaku manda ya ta kumə Lazglafta, <sup>5</sup> ηa ghudzaku tida manda ηa gwal kul snaŋta Lazglafta ya a guli wa. <sup>6</sup> Ma tsa skwiha ya tama ná, ma tsaghu sani ta sani ka nənɓapta, kabga dza'a ghuzlanap ghuzla Lazglafta tiri ta gwal ta maga mndərga tsaya, manda ya ghada ηni ta mnuta ya. <sup>7</sup> Hgaf a Lazglafta ta amu ηa maga sli'insli'in wa. Hgaf ηa nzata mu hezle' a ta amu. <sup>8</sup> Tsaya tama, ka va a yu ta tsa gwada ya wu ka mndu katsi, mndu a vziŋ tsi wu, Lazglafta ta vlaghunatá Sulkumani nda ghuɓa ya vziŋ tsi.

<sup>9</sup> Ta ghəŋa dɓuvusta ghuni ta ghəŋa ghuni ná, ta dza'a vindaghunafta nda vinda a lu wu, kabga ghadaghada Lazglafta ka ghəŋani ta taghaghunafta. <sup>10</sup> Tsaya skwi ta magə kuni ηa inda\* mnduha Lazglafta ta hadika Mekaduniya demdem. Ta ndəɓa dzva yu da kaghuni zwanama, ka kdanťa kuni ta magay ta kəma ta kəma. <sup>11</sup> Nəwawaŋa ka nzata kuni nda zdaku, ma tsatsafaku kuni ta tsatsafaku, magawamaga ta slna nda dzva ghuni ηa kata ghəŋa ghuni, manda ya ghada ηni ta mnaghunata ya. <sup>12</sup> Ka mantsa ka kuni magay katsi, dza'a vlay gwal ta kul zlghafta ta glaku ηa ghuni, had kuni dza'a slaslamaku guli wa.

### *Gwada ta sagha Mgham Yesu*

<sup>13</sup> Zwanama da, ta kumay yu ta snaŋta ghuni ta skwi ta ghəŋa gwal nda rwa, da nzatá kuni

\* **4:10** Ngha ta 2 La Kwareŋt 1:16.

sasu'anaka manda gwal ta kul faftá ghəŋa taŋ ta Yesu. <sup>14</sup> Tsəhala grafgra amu kazlay: Mtumta Yesu ka sli'agaptá tsi kə'a ya, mantsa ya guli ná, grafma gra guli kazlay: Dza'a sli'aganapsli'a nda ma Yesu ta inda gwal ta rwuta kawadaga nda Yesu ma zlgħay nda ŋuduf guli kə'a.

<sup>15</sup> Na gwađa dza'a ŋni mnay ndanana ná, gwađa ya mna Mgham Yesu ya. Bađu tsa fitik dza'a vragata tsi ya ná, tinlaghuta a amu ta ndiri ya ta gwal nda rwa wa. <sup>16</sup> Bađu tsaya, dza'a ghudzaga ghudzaga lwa Lazglafta, ŋa kapaŋta mali ta ghəŋa duhwalhani ta lwi, ka vyatá dula Lazglafta, ŋa saha Mghama mu Yesu ka ghəŋani ta luwa, ŋa sli'agapta gwal nda rwa ma Kristi karaku taŋtaŋ, <sup>17</sup> ŋa hla amu ta ndiri ya kawadaga nda həŋ ma ghwayak, ŋa dza'a guyaku nda Mgham Yesu ma ghuvanata luwa. Mantsa ya tama, ŋa nzakwa mu ŋa dekdek kawadaga nda Mgham† Lazglafta. <sup>18</sup> Tsaya tama ləuvuswa ŋuduf nda tsa gwađaha ya.

## 5

### *Sna a lu ta fitik dza'a vragata Yesu wa*

<sup>1</sup> Zwanama da, pahəgla a kuni ta vindaghunafta ka ta wati fitik, nda ya ka ta wati luwa dza'a magakwa tsa skwiha ya wa. <sup>2</sup> Nda sna kaghuni ka ghəŋa ghuni kazlay: Manda ghali ta sagha girvidik\* ya dza'a sagha fitika Mgham Yesu kə'a. <sup>3</sup> Ma fitika mnay mnduha kazlay: Zda nzaku, ta had hwazlaḅaku† wu kə'a ya, gi ma tsaya dza'a

---

† **4:17** Aya 15-17: Gray nda 1 La Kwareŋt 15:51-52. \* **5:2** Gray nda Mata 24:43, Lukwa 12:39, 2 Piyer 3:10. † **5:3** Gray nda Irmiya 6:14, 8:11.

slakwa 6adzaku, manda va ya ta sagha fitika dgakwa marakw nda huđi dluk ya. Had həŋ dza'a ndapta mida wa. <sup>4</sup> Kaghuni zwanama da, ma grum a nzatá nzakwa kaghuni, ɲa sagha tsa fitik ya ksaghunaghata manda ghali wa. <sup>5</sup> Kaghuni demdem ná, zwana tsuwadaka fitik kaghuni. Nza a amu manda gwal ma grum girvidik ya wa. <sup>6</sup> Ka si mantsa tsi katsi, ma ksu hani ta amu manda ɲa sanlaha ya. Katək ná, nzamanza hzleɲa ndiri ka zlaha vgha mu. <sup>7</sup> Gwal ta hani ná, girvidik ta hana həŋ ta hani, girvidik ta ghuyakwa həŋ ta ghuyaku guli. <sup>8</sup> Amu ya, giftik ta mbađa amu ta mbađa. Zlaha ma vgha mu. Klafma zlghay nda ɲuđuf nda đvu ka nzakwa həŋ manda sudatá lguta kufur ɲa wara nda tsi. Fafma ghəŋa mu ta mbaku manda fatá takazak‡ ma ghəŋ. <sup>9</sup> Pəgha a Lazglafta ta amu ɲa ghuzlamap tiri wa. Hgafhga ta amu ɲa mbamafta nda ma Mghama mu Yesu Kristi. <sup>10</sup> Ta ghəŋa amu mtuta Yesu, ɲa nzakwa mu kawadaga nda tsi. Dər má ta nda iri mu, dər má nda rwa mu, kawadaga nzatá nzakwa mu nda tsi. <sup>11</sup> Tsaya tama, mbruvuswambra ta vgha ghuni, katuvuswa kata ta vgha ghuni manda ya ta magə kuni ndanana ya.

### *Dzatá ghəŋa gwada Pwal*

<sup>12</sup> Zwanama da, ta ndəba dzvu yu da kaghuni, vlawa glaku ɲa gwal ta ksa slna Lazglafta mataba ghuni, gwal zbap Lazglafta ka fata ta ghəŋa kaghuni ɲa taghaghunaftá tvani ya. <sup>13</sup> Vlawa glaku ɲa taŋ dar ka đvuta kuni ta həŋ katakata ta

---

‡ 5:8 Gray nda Isaya 59:17, Afisus 6:11-17.

ghəŋa slna taŋ. Nzuvuswanza nda zdaku mataba ghuni, nda ya nda sanlaha guli.

<sup>14</sup> Zwanama da, ta ndəba dzvu yu da kaghuni, dvawadva ta gwal ta yadi, tsafarawa gwal hulebhuleba, vlawa mbraku ŋa gwal htu mbrakwa taŋ, ka ksa kuni ta ŋuduf nda inda mndu. <sup>15</sup> Daswa ka kuni, da vranamtá mndu ta ŋaslu ta mndu nda ŋaslu. Nəvawaŋa katək, ka maga skwi ya dina mataba ghuni, nda ya ŋa hamata sanlaha tani.

<sup>16</sup> Nda rfu ka kuni nzakwa ghuni. <sup>17</sup> Ma zlanap kuni ta maga du'a. <sup>18</sup> Rfanaghawa Lazglafta dər ta ghəŋa wati ma skwi tsi, kabga tsaya skwi ŋa magay ghuni ta zdəganatá Lazglafta, na tsa kaghuni gwal nda ndi'a nda Yesu Kristi ya.

<sup>19</sup> Ma su'ufiŋ kuni ta Sulkum nda ghuḅa, <sup>20</sup> Ma mnə kuni ta mtsiriu' nda gwada la anabi. <sup>21</sup> Ama kwatsadapwa inda skwi demdem, ka zbapta kuni ta ya dina, <sup>22</sup> ka tsaghuta kuni ta vgha nda inda bədzaku.

<sup>23</sup> Ka ghuḅaghunaghuḅa Lazglafta ya ta vlatá zdaku kaghəŋani, ka naghunaftá tsi ka ŋani dardar. Ka ngha tsatsi ta kaghuni tsuhtsuh, nda sulkuma ghuni tani, nda hafa ghuni tani, nda slu'uvgha ghuni tani. Tsaya dza'a kwal rutsak kul nzafta ta kaghuni ma fitika sagha Mghama mu Yesu Kristi. <sup>24</sup> Dza'a magay tsa Lazglafta ta hgaftá kaghuni ya, kabga ta magay ta inda skwi ya mna tsi.

<sup>25</sup> Zwanama da, ndəbawa dzvu ta ghəŋa aŋni.

<sup>26</sup> Ka ganaghata kuni ta zgu ta zwanama nda dvaftá vgha hmətət.

<sup>27</sup> Ta ndəba ghunatá dzvu yu ma hga Mgham Yesu. Ka dzaŋanafta kuni ta na delewer na ta inda zwanama.

<sup>28</sup> Ka nza zɔakatahuda Mghama mu Yesu Kristi kawadaga nda kaghuni.

## **Deftera Lfida Dzratawi New Testament in Hdi**

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Hdi

**© 2013, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 22 Feb 2024 from source files  
dated 29 Jan 2022

f257b780-c0dd-5cce-9b20-430484439898